



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0028233 26

Sarajevo, 23.03.2026. godine

Na temelju člana 35. stav 2. tačka e), te člana 216. stav 3. Zakona o kaznenom postupku Bosne i Hercegovine, donosim

NAREDBU
O NEPROVOĐENJU ISTRAGE

U vezi e-mail-a sadržaja „Izazivanje i raspirivanje vjerske i nacionalne mržnje, te otvorenog poziva na rušenje vjerskog objekta u Bijeljini“, poslanog sa e-mail ... na zvaničnu e-mail adresu Tužiteljstva, dana ... 2026. godine, i u prilogu dostavljenog „screenshot“-a komentara na društvenoj mreži „Facebook“, te eventualnog počinjenja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona Bosne i Hercegovine, iz razloga što je iz prijave i pratećih spisa očigledno da prijavljeno djelo nije kazneno djelo.

O B R A Z L O Ž E N J E

Tužiteljstvo Bosne i Hercegovine je, dana ... 2026. godine, na zvaničnu e-mail adresu Tužiteljstva Bosne i Hercegovine „info@tuzilastvobih.gov.ba“, zaprimilo e-mail pod nazivom „Izazivanje i raspirivanje vjerske i nacionalne mržnje, te otvorenog poziva na rušenje vjerskog objekta u Bijeljini“, poslat sa e-mail adrese ..., u kojoj je kao prilog dostavljen „screenshot“ komentara na društvenoj mreži „Facebook“, sadržaja: „Trebaj taj smrad srušiti Turski jer su nabijali Srbe na šiljak“, ostavljen od strane korisnika „Facebook“ profila „(...)“.

U zaprimljenom e-mailu navedeno je da iz komentara „Facebook“ korisnika „(...)“ proističe da navedena izjava predstavlja otvoreni poziv na rušenje bogomolje (sakralnog objekta), podsticanje na nasilje, širenje vjerske i nacionalne mržnje, ozbiljno ugrožavanje sigurnosti i javnog reda i mira.

Nakon analize sadržaja prijavljenog komentara, ostavljenog na društvenoj mreži „Facebook“, Tužiteljstvo Bosne i Hercegovine cijeni da se u istom ne ostvaruju bitna obilježja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. stav 1. „Ko javno izaziva ili raspiruje nacionalnu, rasnu ili vjersku mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini, kazniće se kaznom zatvora od tri mjeseca do tri godine.“, i stav 2. „Ko javno podstrekne na nasilje ili mržnju usmjerenu protiv grupe osoba ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost, ako takvo ponašanje ne predstavlja krivično djelo iz stava (1) ovog člana, kazniće se kaznom zatvora od tri mjeseca do tri godine“.

Detaljnije, komentar „Treba taj smrad srušiti Turski jer su nabijali Srbe na šiljak“, iako kao govor mržnje društveno spornog sadržaja, ne sadrži elemente javnog izazivanja ili raspirivanja rasne ili vjerske mržnje, razdora ili netrpeljivosti među konstitutivnim narodima i ostalima, kao i drugima koji žive ili borave u Bosni i Hercegovini propisano članom 145a. stav 1. Kaznenog zakona BiH, kao što ne predstavlja ni u prijavi navedeno podstrekavanje na rušenje vjerskog objekta u Bijeljini, aludirajući na član 145a. stav 2. Kaznenog zakona BiH, odnosno, navedenim komentarom se javno ne podstrekava na nasilje ili mržnju usmjerenu protiv grupe osoba ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost.

Shodno navedenom, nakon analize sadržaja prijavljenog komentara, te razmatranja mogućnosti postojanja elemenata bića kaznenog djela propisanog članom 145a. Kaznenog zakona Bosne i Hercegovine, Tužiteljstvo Bosne i Hercegovine je, na temelju člana 216. stav 3. Zakona o kaznenom postupku Bosne i Hercegovine, iz razloga jer je iz prijave i pratećih spisa očigledno da prijavljeno djelo nije kazneno djelo, donijelo Naredbu o neprovođenju istrage.

Sukladno članu 216. stav 4. Zakona o kaznenom postupku BiH, Tužiteljstvo Bosne i Hercegovine će u Zakonom propisanom roku obavijestiti podnositelja prijave o donošenju ove Naredbe i o mogućnosti ulaganja pritužbe protiv iste Uredu tužitelja, u roku od 8 (osam) dana od dana zaprimanja Obavijesti.

**TUŽITELJSTVO/TUŽILAŠTVO BiH
TUŽITELJ**